



1/2023 Foru Dekretua, urtarilaren 17koa, Oinordetzen eta Dohaintzen gaineko Zergaren Erregelamendua onesten duena.

AZALPEN OHARRA

Testu hau dibulgaziozkoa da soilik, eta ez du inolako izaera ofizialik. Eguneratutako Foru Arau osoa jasotzen da bertan.

AURKIBIDEA

I. KAPITULUA.....	3
PROZEDURAK.....	3
1. artikulua. Zerga egitateen presuntzioei buruzko prozedura.....	3
2. artikulua. Jarauntsiko masari ondasunak gehitzeko prozedura.....	3
3. artikulua. Kausatzailearen zorrak kentzeko prozedura, zor horiek zerga ordaindu ondoren agerian jartzen direnean.....	3
4. artikulua. Dohaintza-emailearen zorrak kentzeko prozedura, dohaintza-hartzaileak ordaindu dituenen.....	4
5. artikulua. Fiduariarioak ordaindutako soberakina itzultzeko prozedura, fideikomisodunari karga txikiagoko tarifa bat dagokionean.....	4
II. KAPITULUA.....	4
ZERGAREN KUDEAKETA.....	4
6. artikulua. Autolikidazioa aurkezteko eta diru-sarrera egiteko moduak.....	4
7. artikulua. Aurkeztu beharreko agiriak.....	5
8. artikulua. Epeak etetea testamentu auzia edo borondatezko testamentu epaiketa sustatzeagatik.....	6
9. artikulua. Jaraunsle ezezagunen kasua.....	7
10. artikulua. Autolikidazioa izapidetzea.....	8
III. KAPITULUA.....	8
GERORAPENAK ETA ZATIKAPENAK.....	8
11. artikulua. Ordainketak geroratu eta zatikatzea inbentarioan behar besteko eskudirurik edo erraz gauzatzeko moduko ondasunik ez egoteagatik.....	8
12. artikulua. Ordainketak geroratzea kausadunak ezezagunak direnean.....	8
13. artikulua. Bizitza aseguruaren kontratuengatik errenta moduan jasotako diru kopuruetatik eratorritako kuota zatikatzea.....	9
14. artikulua. Gerorapenak enpresa indibidualaren kostu gabeko eskualdaketetan.....	9

Oinordetzen eta Dohaintzen gaineko Zergari buruzko martxoaren 10eko 2/2022 Foru Araua onetsi izanak beharrezko egin du zergak indarrean duen erregelamenduzko garapena eguneratzea, haren edukiaren zati handi bat foru arauaren parte izatera pasa den neurrian.

Garapen hori egokitu eta arauan xedatutakoarekin koherente izango den erregelamendu sistematizatu bat izateko, bidezkoa da Oinordetzen eta Dohaintzen gaineko Zergaren Erregelamendu berria onartuko duen foru dekretu bat onestea Oinordetzen eta Dohaintzen gaineko Zergari buruzko martxoaren 10eko 2/2022 Foru Araua garatzearren.

Esan beharra dago onartu nahi den erregelamenduzko garapena, funtsean, urriaren 22ko 42/2012 Foru Dekretuaren bidez onetsitako erregelamenduan ageri denaren antzekoa dela, 2/2022 Foru Arauan jasota ez dagoen zatian. Era berean, erregelamendu berriaren barruan ere jasotzen da



urtarrilaren 11ko 3/1990 Foru Arauan, Oinordetzen eta Dohaintzen gaineko Zergarena, gerorapen eta zatikapenei dagokienez jasotzen den erregulazioa.

Hala, erregelamenduak 14 artikulua ditu, hiru kapitulutan banatuta, eta, hurrenez hurren, prozedurazko alderdiak, zergaren kudeaketa eta oinordetzen eta dohaintzen gaineko zergaren autolikidazioen ondoriozko zorraren geroratzeak eta zatikatzeak garatzen dituzte.

Aipatutako 2/2022 Foru Arauaren azken xedapenetako laugarrenak dio Foru Aldundiak eta Ogasun eta Finantza Departamentuko foru diputatuak behar diren xedapenak eman ahal izango dituztela arau hori garatu eta aplikatzeko.

Bestalde, uztailaren 12ko 6/2005 Foru Arauak, Gipuzkoako Lurralde Historikoaren Erakunde Antolaketa, Gobernu eta Administrazioari buruzkoak, 31. artikuluan xedatzen du Diputatuen Kontseiluak eskumena duela Batzar Nagusietan onartzen diren foru arauak garatu eta exekutatzea helburu duten erregelamenduak onesteko.

Horrenbestez, Ogasun eta Finantza Departamentuko foru diputatuak proposaturik, Lege Aholkularitzako Batzordearekin bat etorritik, eta Diputatuen Kontseiluak gaurko bileran eztabaidatu eta onartu ondoren, hau

XEDATZEN DUT

Artikulu bakarra. Oinordetzen eta Dohaintzen gaineko Zergaren Erregelamendua onestea.

Onetsita geratzen da foru dekretu honetan eranskin gisa jasotzen den Oinordetzen eta Dohaintzen gaineko Zergaren Erregelamendua, Oinordetzen eta Dohaintzen gaineko Zergari buruzko martxoaren 10eko 2/2022 Foru Araua garatzen duena.

Xedapen indargabetzailea.

Indargabeturik geratzen dira foru dekretu honetan eta erantsitako erregelamenduan xedatutakoarekin bat ez datozen maila bereko edo txikiagoko xedapen guztiak, eta, bereziki, urriaren 22ko 42/2012 Foru Dekretuaren bidez onetsitako Oinordetzen eta Dohaintzen gaineko Zergaren Erregelamenduko 42tik 45era eta 47tik 52ra bitarteko artikulua.

Azken xedapenetako lehena. Arauak emateko ahalmena.

Ogasun eta Finantza Departamentuko foru diputatuari baimena ematen zaio onartzen den erregelamenduan ezarritakoa garatzeko eta aplikatzeko beharrezkoak diren xedapen guztiak eman ditzan.

Azken xedapenetako bigarrena. Indarrean jartzea.

Foru dekretu hau Gipuzkoako Aldizkari Ofizialean argitaratu eta biharamunean jarriko da indarrean.

ERANSKINA

OINORDETZEN ETA DOHAINTZEN GAINEKO ZERGAREN ERREGELAMENDUA.



I. KAPITULUA

PROZEDURAK

1. artikulua. Zerga egitateen presuntzioei buruzko prozedura.

Zerga Administrazioa jakitun denean erregelamendu honen 12. artikuluan aipatzen diren zerga egitateetako bat gertatu dela, zeinean oinarritzen baitira zergari lotutako ondare gehikuntzak egoteari buruzko presuntzioak, eta gehikuntza horiek ez badira autolikidatu foru arau bereko 69. artikuluan ezarritako epeetan, interesdunei horren berri emango die, zerga egitatearen existentzia buruz beren adostasuna edo desadostasuna adieraz dezaten. Orobat, hamabost eguneko epea emango zaie egoki irizten dituzten alegazioak formulatu eta bidezko frogak edo agiriak aurkez ditzaten.

Epe hori igaro ondoren, eta espedientea ikusita, Zerga Administrazioak bidezkoa den ebazpena emango du, eta, hala badagokio, likidazioak igorriko ditu bere ustez gertatutzat jo behar diren zerga egitateengatik.

2. artikulua. Jarauntsiko masari ondasunak gehitzeko prozedura.

«Mortis causa» eskurapen baten autolikidazioa behin aurkeztuta, Zerga Administrazioak egiaztatzen badu kausatzailearen ondasunen inbentarioan aipatu gabe utzi direla zergaren foru arauko 22tik 29ra bitarteko artikuluetan jasotako egoeretako batean dauden ondasunak, jakinaren gainean jarriko ditu interesdunak, eta hamabost eguneko epea emango die aipatu ez diren ondasunak kausatzaileak utzitako ondasun multzoari gehitzearekin ados dauden adieraz dezaten.

Interesdunek gehitze hori onartzen badute, egiten diren likidazioek gehitzen diren ondasunen balioa jasoko dute zerga oinarrian.

Interesdunek, eman zaien epearen barruan, ez badute onartzen ondasunak gehitzeko proposamena edo epea amaitzen bada erantzunik eman gabe, Zerga Administrazioak espediente bat irekiko du ondasunak gehitzeari buruz erabakitzeko, eta interesdunei hamabost eguneko epea emango die egoki irizten dituzten alegazioak egin eta beren iritziz bidezkoak diren agiri edo frogak aurkezteko. Epe hori igarota, ondasunak gehitzeko egokitasunaz erabakiko da.

Egoera horietako batean dauden ondasunak gehitzeari buruzko egintza administratiboaren aurka berraztertze errekurtsua jarri ahal izango da, baita bide ekonomiko-administratibotik jo ere.

Administrazio bidea ondasunak gehitzearen aldeko erabakiaz amaitzen bada, Zerga Administrazioak bidezko diren behin-behineko likidazioak egingo ditu, hala badagokio.

3. artikulua. Kausatzailearen zorrak kentzeko prozedura, zor horiek zerga ordaindu ondoren agerian jartzen direnean.

Zergaren foru arauaren 32. artikuluko 3. apartatuan adierazitakoarekin bat, kausatzailearen zorrak agerian jartzen badira interesdunek egindako autolikidazioak ordaindu eta gero, zor horiek prozedura honen arabera kenduko dira:

1.a. Interesdunek idazki bat aurkeztuko diote Zerga Administrazioari, zuzendu beharrekoa zuzen dezan eskatzeko, eta, idazki horrekin batera, agiri bidez frogatu behar dute zorra existitzen dela edo autolikidazioen diru-sarrera egin ondoren ordaindu dela.

2.a. Zorra badagoela edo ordainketa egin dela frogatutzat ematen bada, dagokion zerga zatia itzultzeko eskubidea aitortzen duen erabakia hartuko da.

3.a. Kenkaria gauzatzeko, kendu ez den zorraren zenbatekoari dagokion zerga zatia itzuliko da, berandutze interesik gabe. Ordaindutako zenbatekoaren eta autolikidazioa egitean zorraren zenbatekoa kendu balitz ordainduko zen zenbatekoaren artean dagoen diferentzia, horixe izango da zerga zatia.

4.a. Artikulu honetan xedatutakoa ez da aplikatuko autolikidazioa aurkezteko epea amaitu denetik lau urte igaro badira edo administrazioaren likidazioak irmoak eta behin betikoak badira.

4. artikulua. Dohaintza-emailearen zorrak kentzeko prozedura, dohaintza-hartzaileak ordaindu dituenean.

Zergaren foru arauak 36. artikuluan adierazitakoarekin bat, dohaintza-emailearen zor bat hark dohaintzan emandako ondasunen gaineko eskubide erreala bermatuta badago, eta zor hori dohaintza-hartzaileak ordaindu badu dohaintzari dagokion zerga sartu ondoren, erregela hauek aplikatuko dira zor horri dagokion zerga zatia itzultzeko:

1.a. Interesdunak zuzenketa eskatu beharko dio, idatziz, Zerga Administrazioari, ordaindutako kuoten itzulketa eskatzeko eskubidea preskribatu baino lehen, zorra badagoela edo diru-sarrera egin ondoren zorra ordaindu dela frogatzen duten agiriak ere erantsita.

2.a. Dohaintza-emaileak zorra ordaindu duela frogatutzat ematen bada, itzulketarako eskubidea aitortzen duen erabakia hartuko da, berandutze interesik sartu gabe. Beste edozein kasutan, itzulketaren kontrako erabakia hartuko da.

3.a. Ordaindu den eta dohaintzaren zerga oinarrian kendu ez den zorrari dagokion zerga zatitza hartuko da ordaindutako zenbatekoaren eta autolikidazioa egitean zorraren zenbatekoa kendu balitz ordainduko zenaren arteko diferentzia.

5. artikulua. Fiduziarioak ordaindutako soberakina itzultzeko prozedura, fideikomisodunari karga txikiagoko tarifa bat dagokionean.

Zergaren foru arauaren 54. artikuluko 2. apartatuan adierazitakoarekin bat etorritik, jaraunsle fideikomisoduna zein den behin jakin ondoren, ikusten bada hari dagokion tarifak fiduziarioak aplikatutakoa baino karga txikiagokoa izan behar duela, lehendik aurkeztutako autolikidazioa zuzentzeko eskaera aurkeztuko du, jaraunsle fideikomisodunari dagokion tarifa bertan aplikatuz eta soberan ordaindutakoaren itzulketa eskatuz.

II. KAPITULUA

ZERGAREN KUDEAKETA

6. artikulua. Autolikidazioa aurkezteko eta diru-sarrera egiteko moduak.

1. Zergadunak behartuta daude oinordetzen eta dohaintzen gaineko zergaren autolikidazioa aurkeztera eta sinatzera, zergaren foru arauaren 68. artikuluan eta haren hurrengoetan aurreikusitako terminoetan eta erregelamendu honetan ere jasotako moduan.



2. Ogasun eta Finantza Departamentuko foru diputatuak foru agindu bidez arautuko du zer modutan jardun beharko den autolikidazioak aurkezteko eta haietatik ondorioztatzen diren kuotak ordaintzeko.

7. artikulua. Aurkeztu beharreko agiriak.

1. Autolikidazioaren zenbatekoa ordaindu ondoren, zergadunek zerga sorrarazi duen egintza edo kontratua dokumentatzen duen agiri notarial, judizial, administratibo edo pribatuaren jatorrizko alea eta kopia soila aurkeztu behar dizkiote Zerga Administrazioari, eta agiri horretan zehaztuta egon behar du zer balio erreal duen tributua zerga oinarrian sartu den ondasun edo eskubide bakoitzak. Ondasun higiezinak eskualdatzen direnean, ondasun higiezinaren gaineko zergaren ondorioetarako esleitutako erreferentzia katastrala eta zenbaki finkoa jaso beharko dira agiri horietan.

Horrez gain, honako dokumentazioa aurkeztu beharko da:

A. «Mortis causa» eskurapenen kasuan, agiri hauek erantsiko dira:

a) Kausatzailearen heriotza agiria eta Azken nahien erregistro orokorrak emandako ziurtagiria. Orobat, kausatzailearen eta haren jaraunselearen edota legatadunen nortasun agiriaren fotokopia atxikiko da, salbu eta agirien zenbakiak lehendik aurkeztutako dokumentu publikoetan ageri direnean eta haien adina zein den aintzat hartu behar ez denean. Gainera, kausatzailearekiko ahaidetasun maila frogatu beharko da, familia liburua eta bestelako egiaztagiriak aurkeztuta, ahaidetasuna mailarik urrunenekoa denean izan ezik.

b) Testamentu xedapenak, halakorik badago, edo horren ezean, jaraunseleak deklaratu izanaren lekukotza. Testamenturik gabeko oinordetzetan, jaraunselearen deklarazio judiziala egin gabe badago edo nabaritasun aktarik eman ez bada, presuntoen zerrenda bat aurkeztuko da kausatzailearekin duten ahaidetasuna adierazita.

c) Kentzen diren zama, karga, zor eta gastuen frogagiriak eta, hala badagokio, bai finantza entitateetan irekitako kontuen saldoak eta bai burtsan kotizatzen ez duten entitate juridikoetako kapital partaidetzen balio teorikoari dagozkienak. Ibilgailuen kasuan, zirkulazio baimenaren eta fitxa teknikoaren fotokopia erantsi behar dira.

d) Oinordetzan sartutako ondasun higiezinak kausatzaileak eskuratzeko tituluaren frogagiria. Horretarako, ondasun eta eskubideen eskritura publikoen fotokopia aurkeztu beharko da, salbu eta agiri publikoak aurkeztu eta horietan ondasunen deskripzioa eta titulua jasota ageri direnean.

e) Pertsona Fisikoen Errentaren gaineko Zergaren Erregelamenduak, urriaren 14ko 33/2014 Foru Dekretuaren bidez onetsiak, desgaitasun eta mendekotasun mailak frogatzeko 63. artikuluan aipatzen dituen ziurtagiriak.

B. Dohaintzetan eta «inter vivos» egiten diren kostu gabeko gainerako eskurapenetan, hauek erantsiko dira:

a) Dohaintza-emaearen eta dohaintza-hartzailearen nortasun agiriaren fotokopia, salbu eta agirien zenbakiak lehendik aurkeztutako dokumentu publikoetan agertzen direnean eta haien adina zein den aintzat hartu behar ez denean. Gainera, kausatzailearekiko ahaidetasun maila frogatu beharko da, familia liburua eta bestelako egiaztagiriak aurkeztuta, ahaidetasuna mailarik urrunenekoa denean izan ezik.



b) Kentzen diren zama, karga eta zorren frogagiriak. Ibilgailuen kasuan, zirkulazio baimenaren eta fitxa teknikoaren fotokopia erantsi behar dira.

C. Aseguru kontratuengatik jasotako kopuruen kasuan, hauek erantsiko dira:

a) Kausatzaileak hitzartutako kontratuen ale bana, edo, aseguru kolektiboa izanez gero, aseguru entitateak emandako ziurtagiria, zenbat jasoko den eta onuradunak zein diren adierazi behar duena.

b) Erregistro Zibilak emandako heriotza agiria. Gainera, kausatzailearekiko ahaidetasun maila frogatu beharko da, familia liburua eta bestelako egiaztagiriak aurkeztuta, ahaidetasuna mailarik urrunenekoa denean izan ezik.

c) Onuradunaren eta kausatzailearen nortasun agiri nazionala.

d) Aseguruaren polizan onuradunak ez badira berariaz eta zehazki aipatzen legezko jaraunsleengana bidaltzen duelako, beharrezkoa izango da aurkeztea bai kausatzailearen testamentu xedapenak, halakorik bada, eta bai azken nahien ziurtagiria. Testamenturik ez badago, horren ordeztu, jaraunsleak deklaratzeko dituen auto judiziala edo notario akta aurkeztuko da.

D. Zergaren foru arauak 45. artikuluan aurreikusten duen murriztapena aplikagarria denean, beharrezkoa da aurkeztea bai errolda agiria eta bai bizikidetzarena, kasuan kasuko udalak eginak, etxebizitza eskualdatu aurreko bi urteetan eskuratzailea kausatzailearekin edo doako eskualdatzailearekin etenik gabe bizi izan dela frogatzeko; horrek ez du eragozten bizikidetzara frogatzea zuzenbidean onartuta dagoen beste edozein bide erabilita.

2. Autolikidazioa aurkeztean zergadunak salbuetsitzat hartzen badu eskurapena zergaren foru arauko 13. artikuluko a) letran xedatutakoaren babesean, agiri hauek erantsi behar ditu:

a) Nekazaritza gaitan Gipuzkoako Foru Aldundian eskumena duen departamentuak luzatutako ziurtagiria, non titularra identifikatze gain, adierazi beharko baita eskualdatutako finka Nekazaritza Ustialekuen Erregistroan inskribatuta dagoela.

b) Bai eskualdatzailea eta bai eskuratzailea dagokien zentsu fiskalean alta emanda egotearen frogagiriak.

c) Egiten duen nekazaritza jardueragatik, eskualdatzailea Gizarte Segurantzako dagokion erregimenean alta emanda dagoela frogatzen duen agiria, eskuratzailearen alta eskaera ere erantsita.

3. Ogasun eta Finantza Departamentuko foru diputatuak ahalmena izango du erabakitzeke nola aurkeztu beharko den artikuluko honetan zerrendatutako dokumentazioa, eta, orobat, erabaki dezake beharrezko irizten den beste edozein dokumentazio osagarri ere aurkeztu beharko dela ondasun eta eskubideen balorazioa frogatzeko eta salbuespenak, murrizpenak eta gainerako onura fiskalak aplikatzeko.

8. artikulua. Epeak etetea testamentu auzia edo borondatezko testamentu epaiketa sustatzeagatik.

1. Oinordetzen eta dohaintzen gaineko zergaren mendeko zerga egitateei buruzko egintza edo kontratuen inguruan testamentu auzia edo borondatezko testamentu epaiketa sustatzen bada, interesdunek horren berri eman behar diote Zerga Administrazioari.



2. Testamentu auzia edo borondatezko testamentu epaiketa autolikidazioa aurkezteko epearen barruan sustatzen bada, autolikidazioa aurkezteko epeak eten egingo dira, eta prozedura judiziala amaitzen duen behin betiko ebazpena irmo den egunaren biharamunetik aurrera hasiko dira kontatzen berriro. Auzia edo epaiketa autolikidazioa egin ondoren sustatzen badira, ordainketa geroratzea erabaki ahal izango da, Gipuzkoako Lurralde Historikoko Zerga-bilketa Erregelamenduak, abuztuaren 2ko 38/2006 Foru Dekretuaren bidez onetsiak, xedatutakoarekin bat.

3. Artikulu honetan aipatzen diren epeak etetearen ondorioetarako, ez dira auzigaitzat hartuko honako jarduketak:

- a) Testamentuak irekitzea edo horiek eskritura publikoan jasotzea xede duten eginbide judizialak.
- b) Inbentarioak osatzea jaraunspena onura horrekin onartzeko edo horri buruz deliberatzeko.
- c) Tutorea, kuradorea edo defendatzaile judiziala izendatzea.
- d) Abintestatoa edo testamentu epaiketa prebenitzea.
- e) Jaraunsleak deklaratzeko, aurkakotzarik formulatzen ez denean.
- f) Oro har, borondatezko jurisdikzio jarduketak, auzi izaerarik hartzen ez dutenean.

Orobat, ez dituzte epeak etenaraziko legezko atzera eskurapenaren demandak edo doako justiziaren onurarenak, ezta testamentuaren edo abintestatoaren aurkako zorrak likidatzera zuzendutako erreklamazioek ere, hartzekodunaren eskariz epaiketa unibertsala prebenitu arte.

4. Borondatezko testamentu epaiketa sustatzeak epeak etetea ekarriko du, eta epe horiek berriro hasiko dira kontatzen zatiketa eragiketak onartzen dituen autoa edo, aurka egin bada, auziari amaiera ematen dion epaia irmo bihurtzen den egunaren biharamunetik aurrera, edo, bestela, sustatutako epaiketan interesdun guztiek atzera egiten dutenetik aurrera.

Artikulu honen ondorioetarako, ulertuko da auzigaia demanda aurkezten den egunean hasten dela.

Ondorio berberetarako, auzigaiekin parekatzen dira testamentuaren edo eskualdaketa jasotzen duen dokumentuaren faltsutasunari buruzko zigor prozedurak.

5. Auzilariak sei hilabetez uzten badiote auziaren jarraipena sustatzeari, auzia ekarri duen egintza edo kontratuaren autolikidazioa aurkeztu beharko dute, baina horrek ez du eragotziko bidezko itzulketa jasotzea auziaren amaieran ondoriorik gabea izan dela deklaratzeko gero.

Auzitegiek deklaratzeko badute auzia sorrarazi duen instantzia iraungi egin dela, epeak ez dira etentzat joko, eta Administrazioak behar diren zehapenak eta berandutze interesak exijituko ditu autolikidazioa aurkezteko epeak amaitu eta hurrengo egunetik aurrera.

Jarduketak eteten badira alde guztiak ados jarri direlako, etendura eskatu den egunetik aurrera hasiko da berriro kontatzen etendako aurkezpen epea.

9. artikulua. Jaraunsle ezezagunen kasua.

«Mortis causa» eskurapenetan, baldin eta kausadunak ezezagunak badira, jarauntsiko ondasunen administratzaileek edo edukitzaileek autolikidazioari erantsitako agiriak aurkeztu beharko dituzte,



jaraunsleen zerrenda izan ezik, horretarako ezarrita dauden epeak amaitu baino lehen; orobat, aurkezteko epea eteteko eskatu dezakete, horretarako arrazoi egoki bat dutela justifikatuz gero.

Zerga Administrazioaren iritziz arrazoi hori justifikatu gabe geratzen bada, likidazioa egingo du kausatzailearen ordezkartzaren kontura, zergaren foru arauaren 46.1 artikuluko bigarren paragrafoan xedatutakoaren arabera.

10. artikulua. Autolikidazioa izapidetzea.

1. Zerga Administrazioak aurkezleari itzuliko dio aurkeztutako agiri notarial, judizial, administratibo edo pribatua, zigilatutako ohar batean jarrita diru-sarrera egin dela eta kopia aurkeztuta dagoela. Diru-sarrerari buruzko ohar hori Zerga Administrazioak gordeko duen kopian ere jarriko da.

2. Autolikidaziotik ez bada ateratzen ordaindu beharreko zerga kuotarik, Zerga Administrazioak autolikidazioa zigilatu eta ohar bat jarriko du jatorrizko agirian, interesdunen iritziz zilegi den kalifikazioa jasotzeko; gero, aurkezleari itzuliko dio agiria, eta bulegoan kopia soila gordeko da.

III. KAPITULUA

GERORAPENAK ETA ZATIKAPENAK

11. artikulua. Ordainketak geroratu eta zatikatzea inbentarioan behar besteko eskudirurik edo erraz gauzatzeko moduko ondasunik ez egoteagatik.

1. Zergaren foru arauaren 71.3 artikuluko a) letran aipatzen diren «mortis causa» eskurapenetan, interesdunak eskatuz gero, posible izango da kausadunek aurkeztutako autolikidazioetatik ondorioztatzen diren kuoten ordainketa urtebetez atzeratzea, bermerik gabe, baldin eta inbentarioan ez badago kuota horiek ordaintzeko behar besteko eskudirurik edo erraz gauzatu daitekeen ondasunik eta gerorapena ordaintzeko epea amaitu baino lehen eskatzen bada. Gerorapena onartzeak dagokion berandutze interesa ordaindu beharra ekarriko du berekin.

2. Kasu eta baldintza berberetan, ordainketa gehienez ere bost urtetan zatikatu ahal izango da, betiere zorraren ordainketa bermatzen bada.

3. Artikulu honetan aurreikusita ez dagoen guztian, Gipuzkoako Lurralde Historikoko Zerga-bilketa Erregelamendua aplikatuko da, abuztuaren 2ko 38/2006 Foru Dekretuaren bidez onetsitakoa.

12. artikulua. Ordainketak geroratzea kausadunak ezezagunak direnean.

1. Zergaren foru arauaren 71.3 artikuluko c) letran aipatzen diren «mortis causa» eskurapenetan, gertatzen bada ezen, jarauntsiko ondasunen administratzaile edo edukitzaileek eskatu ondoren, inbentarioan ez dagoela zerga zorra ordaintzeko behar besteko eskudirurik edo erraz gauzatu daitekeen ondasunik, Zerga Administrazioak «mortis causa» eskurapenengatik aurkeztu diren autolikidazioen ondoriozko kuoten ordainketa geroratu ditzake, kausadunak zein diren jakin arte, betiere baldintza hauek betetzen badira:

a) Zergaren foru arauko 69.1 artikuluko lehen paragrafoan aurreikusitako epea amaitu aurretik eskatzea gerorapena.

b) Ondasunen inbentarioan ez agertzea behar besteko eskudirurik edo erraz gauzatu daitekeen ondasunik autolikidazioetatik ondorioztatutako zenbatekoak ordaintzeko.

c) Eskaerarekin batera, berme nahikoa eratzeko konpromisoa aurkeztea. Gerorapena behin betiko emateko, bermea eratu beharko da nahitaez.

2. Gerorapena onartzeak dagokion berandutze interesa ordaindu beharra ekarriko du berekin.

3. Artikulu honetan aurreikusita ez dagoen guztian, Gipuzkoako Lurralde Historikoko Zerga-bilketa Erregelamendua aplikatuko da, abuztuaren 2ko 38/2006 Foru Dekretuaren bidez onetsitakoa.

13. artikulua. Bizitza aseguruaren kontratuengatik errenta moduan jasotako diru kopuruetatik eratorritako kuota zatikatzea.

1. Zergaren foru arauak 71.3 artikuluko d) letran aipatzen dituen bizitza aseguruetan, onuradunek errenta horren egungo balioa sartu beharko dute zerga oinarrian.

2. Onuradunak, zergaren foru arauaren 69.1 artikuluko lehen paragrafoan jasotzen den epean, beti eskatu dezake biziarteko zein aldi baterako errentaren egungo balioari karga tasa aplikatzetik ateratzen den kuota zatikatzeko, bermerik gabe, zergaren foru arauaren 44.2 artikuluan aurreikusitako zenbatekoak kenduta, hala badagokio.

3. Zerga Administrazioak eskaeraren ebazpena jakinaraziko dio zergadunari. Bi kasutan baino ezingo da ezetsi eskaera: zerbait faltan duenean edo zergaren foru arauan eta erregelamendu honetan ezarritako baldintzak betetzen ez dituenean.

4. Ordainketa zatikatuari urtean zer diru-sarrera dagokion kalkulatzeko, eragiketa hau egin behar da: zatikatzen den kuota zati errenta jasotzen den urte kopurua, aldi baterako errenta bada, edo zati hamabost, biziarteko errenta bada.

Zatikapena onartzen duen ebazpenak ezarritako epeetan egin beharko da urteko ordainketa zatikatua.

5. Erreskate eskubideaz baliatuz gero, egin gabe dauden ordainketa zatikatu guztiak eskubide hori baliatu ondorengo hogeita hamar egunen barruan egin beharko dira.

6. Errenta iraungitzen bada, benetan jaso den eta ordaintzeko dagoen urteko errentarengatik egin behar den ordainketa zatikatua baino ez da exijituko.

7. Artikulu honetan aurreikusita ez dagoen guztian, Gipuzkoako Lurralde Historikoko Zerga-bilketa Erregelamendua aplikatuko da, abuztuaren 2ko 38/2006 Foru Dekretuaren bidez onetsitakoa.

14. artikulua. Gerorapenak enpresa indibidualaren kostu gabeko eskualdaketetan.

1. Zerga Administrazioak, zergadunak eskatuta, bost urtez geroratu ahal izango du enpresa indibidual bat «inter vivos» edo «mortis causa» eskuratzegatik (kostu gabeko eskurapenagatik) aurkeztutako autolikidazioen kuoten ordainketa.

Zergaren foru arauaren 69.1 artikuluko lehen paragrafoan aurreikusitako epea amaitu baino lehen aurkeztu beharko da eskaera, bermea eratzeko konpromisoa ere erantsita.



2. Aurreko apartatuan aipatzen den kasuan, gerorapena indarrean dagoen bitartean ez da berandutze interesik sortuko.
3. Bost urteko epea amaituta, eta baldintza eta beharkizun berberak betetzen badira, ordainketa sei hilabeteko zazpi epetan zatikatu ahal izango da, diruaren legezko interesa ordainduta zatikapenak irauten duen bitartean.
4. Artikulu honetan aipatzen diren gerorapenek eragina izango dute eskualdatutako enpresaren balio egiaztatuari dagokion zerga zorraren zati proportzionalean, kausadun bakoitzaren jarauntsiko ondasunen guztizkoari dagokionez.
5. Artikulu honetan aurreikusita ez dagoen guztian, Gipuzkoako Lurralde Historikoko Zerga-bilketa Erregelamendua aplikatuko da, abuztuaren 2ko 38/2006 Foru Dekretuaren bidez onetsitakoa.